

上元縣志



地 220.15

34

12

隱逸

宋周啟明字昭回昇州人景德中舉賢良方正科既
詔會東封泰山遂罷不復有仕進意里人稱爲處
士轉運使陳堯禮表其行義於朝賜粟帛仁宗卽
位除試助教就加廩給久之特遷秘書郎改太常
丞卒

元丁復字仲容隱君子也拓落不偶以詩名晚歲盤
桓於冶城護龍之間灌園自樂四方之士多載酒
求詩復引觴揮毫若不經意而語率高絕往往卽
書卷上未嘗起草故稿多不存子壻饒介哀得百
餘篇名檜亭詩稿李桓爲之序

孫轍字履常其先自金陵徙家臨川轍幼孤母蔡氏
教之知警策自樹立比長學行純篤事母甚孝家
居教授門庭蕭然而考德問業者日盛郡中俊秀
皆出其門部使者長吏以下仁且賢者必造焉轍
樂易莊敬接之以禮言不及官府憲司屢辟皆不
就元統二年年七十有三卒於家同郡吳定翁字
仲谷其先嘗宋初卽徙居金陵定翁幼歲儼如成
人寒暑衣冠不少懈清修文雅與孫轍齊名



明龍瑄字克溫牧馬所人才名籍甚與北仲孫羅彝
正陳公甫爲布衣交重然諾尚風義朋友有急竭
力從事江湖豪士每日過金陵不識龍克溫猶徒
行也自號半間居士顧東江作半間居士傳子霓
弘治癸丑會魁官副使罷歸入苕溪社與劉南垣
齊名有詩集行世

倪誠字允恭文僖公謙之兄也幼讀書知大義工詩
善飲人有召輒往往卽傾倒竟日因自號曰坦庵
闢別墅於韓橋江泚畊田釣魚足跡不至城內人
或言其弟姪之貴卽掩耳而走吳匏菴李西崖咸
重之

上元縣志

卷二十三

隱逸

二

王可立人稱丹丘先生元簡幼弟也少有高韻爲諸
生謝去翛然塵外家有小園蒔花木自娛客至焚
香煮茗清言相賞視名利漠然兄死猶子以杉板
一副奉之可立却不受七十後猶手書所纂小程
史數十卷字如蠅頭性好謔冷語逸韻爲士流所
賞而御子弟嚴家法爲人所稱年九十終

史處士名相字元昭號緝熙道人少孤獨養孀母會
詔舉經明行修之士有司以元昭應猶豫未決妻
顧氏曰人盡臣也子寔無二顧養而廢仕誰曰無

君子盍辭焉志遂決工畫山水以老壽終子良佐
拜監察御史以敢言聞

金振號竹溪上元人工詩有隱德少司農南園張公
贈詩曰竹愛孤高溪愛清清高誰得似先生蓋道
其寔也子章成化乙未進士官御史有傳

金琮字元玉自號赤松山農遐嘯清視人莫能窺王
公大人非先施不造其門書法精工待詔極喜之
片紙皆裝潢成帙題曰積玉與史忠稱金陵二隱
有江南二隱稿弟璿字元善精於醫

論曰隱居求志行義達道夫必出可有爲於天下

上元縣志

卷二十三

隱逸

三

而未出始足爲隱士周昭回景德中舉賢良方正
後遷秘書郎固非落落無可采而姑以覆拙者丁
仲容灌園自樂孫履常學行純篤家居教授龍克
溫重然諾尚風義顧東江作半間居士傳倪允恭
文僖謙之兄聞人言弟姪之貴卽掩耳而走王丹
正少爲諸生棄去翛然塵外史元昭不以仕廢養
金竹溪元玉二子清風高視人莫能窺蓋亦隱中
之傑士云

史忠字廷直豪俠不羈薄權貴有不合輒引去或徑
以言折之不顧遇所善則流連忘懷無貴賤皆與

款洽自號癡翁作臥癡樓於冶城之麓列圖史敦
彝位置雅潔有酒引客談笑醉則按拍歌新詞清
亮過雲有時出遊不告家人所往嘗訪沈石田於
吳門沈他出堂中有素絹潑墨成山水巨幅不通
姓名而出石田曰必金陵史癡也要之歸留三月
而別石田來金陵亦館於臥癡樓嘗贊其像曰旁
若無人高歌濶步玩世滑稽風顛月癡酒筆淋漓
水走山飛忠有女及笄壻貧不能具禮癡翁詭携
觀燈同妻送至壻家取笑而別年踰八十預命發
引已隨而行謂之生殯其達生玩世如此

上元縣志

卷二十二

隱逸

四

朱慶期字仲望上元人工詩善畫爲人溫雅無雜好
惟據案讀書讀倦命酒或覽涉諸勝縉紳多喜與
遊無所干求人益重之子睿慤亦嗜書中年好道
構草堂於石頭城之陽曰招隱從衛淇竹焦澹園
諸先生遊築棲賢菴同余集生凌蒼舒輩修東林
遠公故事至今人猶傳之

孫石字介臣上元人宿學有盛名以歲貢不仕抱道
靜居砥礪廉隅時人擬之百尺孤松晚年減緣息
慮求性學之宗旨足跡不逾戶外重其品者謂不
愧先民典刑云石同里同社有廖傅生孔悅張彥

先一儒孔悅太學生博聞強記學有獨得漉囊策蹇日游谿山間一儒性孝友清外父之遺貲爲立嗣絲毫無染父死喪葬大事獨力襄舉不累兄姪由明經爲廣文時攝邑篆值天旱苗稿步禱得雨邑以有秋崇禎乙亥以保舉徵考邑令未選以疾卒於燕邸

張正蒙字子明世居通濟門外之曾灣年九十步履如飛日行數十里不倦詩文豪逸潔修自愛未嘗俯仰於人

魏之璜字考叔少孤貧傭書遂通曉詩文以書畫知上元縣志

卷二十三

隱逸

五

名天性孝友養老親撫諸弟皆取給於十指不肯干人杜門匿影日事盤礴公卿過訪不一報謝慕其高曠者設醴折節以冀其一至清言獻酌坐無考叔不樂也以老壽終

胡宗仁字彭舉本富家子以不謁時貴故食貧晚隱冶城山衲衣拄杖意興蕭散人莫窺其際著詩二百首竟陵鍾惺訂而行之曰知戴齋集尤工畫子二玉昆起昆

張風字大風家貧惟容膝地每天雨湫隘踣卧書案累日妻亡不再聚少爲諸生值時事之棘絕意帖

括衣短衣北走逾廬龍上谷登昌平天壽諸山宿善畫至是益工有中貴子招飲邀館幕中大風起立瞪目不荅酒罷引去抵故鄉多寓僧寮道院泊然世外畫登逸品尾署真香佛空四字或稱昇州道士

方登字嘯門家台城之麓嘗高自期許慕孫登之爲人故以爲名及字又自號樵城子工詩語饒韻致尤不喜見貴人視世之山人單以詩贊貴門者分霄壤焉年七十餘卒於杜山狂同時

房宏中字子潤一字筮眉京庠生善古文詩詞貌頎上元縣志
卷二十三 隱逸
六
皙而癯嗜酒能書好遊崇禎丁丑賦詩六章棄妻子去後清涼寺僧西存於匡山見之云我將往我眉不知所終

論曰史廷直高視濶步玩世滑稽其同妻送女至壻家取笑而別豈真痴翁哉朱仲望溫雅無雜好孫介臣人擬之百尺孤松張子明詩文豪逸魏考叔杜門匿影而公卿設醴折節下之胡彭舉本富家子以不謁時貴故貧張大風少爲諸生值時事之棘絕意帖括衣短衣北走善畫登逸品方嘯門工詩尤不喜見貴人房子潤崇禎丁丑賦詩六章

棄妻子去莫知所終蓋古逸民之流與

國朝

鄧良材字干霄年十八始授經卽能通大義讀書過目不忘尤潛心於象山陽明之學目無忤視動必以禮嚴於辭受非義之交介然弗屑也爲諸生留心世務以節義自許甲申之變號慟累日棄舉子業絕意進取葛巾野服頽然自放於山水之間子士傑登辛丑進士同時周掌文字澤宮家貧有志操不屑干人篤師友之誼書法精楷工小篆授徒家巷晚歲屏居冶城黃冠野服手鐫小章佩以明上元縣志

卷二十三

隱逸

七

志年七十餘卒

胡長庚字星卿東川侯海之後也海子觀尚南康長公主以靖難兵不屈失侯降襲世指揮使長庚幼有大志崇禎朝以陰讓其弟已則事帖括爲名諸生晚盡棄家財結廬南康墓旁足跡不入城市號茅屋老人卒年七十餘門人私謚曰貞讓

黃周星字九烟年二十以明經貢北雍舉崇禎庚辰進士授戶部主事卽疏論時宰奪情事詞氣愷直旣滄桑互異遂棄家走閩爲道士更號笑蒼奔走四方殆四十年癸亥五月五日書絕命詞負平生

著述躍水中死年七十三

張怡字瑤星明諸生父可大以總兵官盡節登萊蔭怡錦衣千戶甲申寇陷京師逼怡降怡奮呼大罵曰吾家受國厚恩恨不能滅汝負罪多矣肯降汝耶賊帥怒械之歸不食求死賊匿怡複壁中乘間逸去

國朝耆定隱姓名築室攝山之白雲峰自號白雲山人年八十八卒

孫自修字無修邑人天啓甲子鄉薦授陽江令遷貳大同感時亂盡遣愛妾棄家祝髮巖棲谷汲縛茅

上元縣志

卷二十三

隱逸

八

干人迹罕至之處顏曰懸溪庵嘗擔柴負重以自給其子間關往省勅斷家事以學道讀書相勉而已交遊有識其面者避去不顧甲午示寂庵中

趙起元字庶先世江寧之上元人生而穎異就外傳卽希心聖賢之學晝誦經籍夜輒澄思達旦研精之極夢與神通有黃衣人指授經籍疑義遂造精詣甲申後結椽鍾山之麓著書講學引掖後進多所裁成嘗一再見黃石齋先生得易象洞璣微旨著事易心尚書大問詩權箋義禮權大問春秋大義十論諸書學者稱隱居客菴先生

郭延庚字埒立明邑弟子員博學善屬文兼通武畧志切救時奈終困場屋鬱不得伸性至孝就養無方母計氏病篤羣醫束手庚嘗其糞甘日夜憂泣籲天禱神願以身代尋愈人以為誠孝所感學按兩臺採實奏聞持建坊表顏曰孝子生員甲申後遂隱居江北洲上躬耕自適終身不入城市嘗自為傳以見志云子殿畿邑庠生有孝行曾孫琪肇鴻元孫諫臣元盜元益俱庠生

楊大郁字炯伯明應天府庠生性耿直動以禮法自繩順治十六年海寇騷動省城戒嚴郁故貧甚不上元縣志

卷二十三 隱逸

九

舉火三日猶端坐讀妻旁侍有隣某營兵素敬禮郁饋斗米郁嘆曰奈何以楊大郁食營兵粟乎麾之去已而剝啄聲急郁疑營兵復來啓戶視之則同里錢季水所遣遺也郁曰嘻是可受蓋簞豆生死之際而操不苟如此父卒服白衣冠終身不除人稱孝帽先生

楊廷俊字顓之庠生甲申後棄儒冠怡情山水不聞時事年七十四卒子士元登順治辛丑進士

金呂字伊仲號綸叟郡諸生讀書修行砥礪廉隅值崇禎甲申之變隱居不仕慕靖節先生之為人以

詩酒自娛嘗自題小像云吾思陶夫子日與惠公
遊松菊百草意歸來何所求予持數珠子問佛齋
心頭不似形役者隨流逐浪鷗孫逢年郡庠生

徐慚字子貫號下泉大父名揚先起家進士歷太僕
卿節苦志力學其篤倫盡道懿行尤多如易產以
賻兄喪貧乏以贍孀妹皆其卓卓者獨不屑爲舉
子業棄青衿如脫屣金沙王雲衢擬之徐孺子申
蟠云

袁瑛字五修號古香甫冠食餼於庠負氣節詩文俊
逸雄暢與張白雲杜茶村遊師事章格菴公十餘

上元縣志

卷二十三

隱逸

十

年故其學根柢深厚晚年悠游里閭放懷山水著
聽雪軒詩古文詞雜著八十餘卷卒年八十三

潘震字大川性孤介不樂仕進讀書勵行尤工於詩
卜居雞籠山之麓時與二三知己登眺遊覽興至
輒賦詩以抒懷抱年七十卒

論曰乾之初九其象曰潛其占曰勿用勿用者不
當用也前明甲申寇亂諸君子不幸而生於其際
或以節隱或以孝隱或以友教隱或以方外隱要
其中皆有一致命遂志之義毅然不可回而後不
得已有託而逃焉予觀鄧干霄胡星卿黃九烟尚

矣張白雲孫無修郭埒立楊炯伯其尤峻絕者也
趙客菴學問中人楊顓之金伊仲知潔其身矣若
徐子貫之棄青衿袁古香潘大川之能詩殆亦庸
中之佼佼者哉

